Gaana Bajana Band Karo Tum Musalman Ho!

Naujawan Bhaiyo Se Guzarish Hai Ke Ek Martaba Is Risale Ko Zaroor Padhein



GAANA BAJANA BAND KARO TUM MUSALMAN HO!

NAUJAWANO KO GAANA BAJANA CHHODNE PAR MAJBOOR KARNE WAALA RISALA

PESHKASH: BAZME FAIZAN-E- RAZA

Risale Ka Naam : Gaana Bajana Band Karo, Tum Musalman Ho! Prepared By : Muhammad Sabir Ismayeeli Qadri Razvi

Language: Roman Urdu

Topic: Islaah

Presented By: Bazme Faizan -e- Raza

Published In: 2018 Total Pages:

Price:

All rights reserved

Contact Us Bazme Faizan -e- Raza Hazaribagh (Jharkhand) 825301 Mobile : +919102520764

Email: sabirismayeeli@gmail.com

Visit Our Blog: bazmefaizanerazaofficial.blogspot.com



Allah Ta'ala Ka Hum Par Bahut Bada Ehsan Hai Ke Usne Humein Sabse Behtareen Ummat Mein Paida Farmaya Aur Apne Pyaare Nabi Sallallaho Alaihi Wa Aalihi Wasallam Ko Humare Beech Bheja Taaki Hum Andhero Se Nikal Kar Raushni Mein Aa Jaayein, Nafrat Ke Ghar Ko Gira Kar Muhabbat Ka Mahal Banayein, Buraiyo Ko Chhod Kar Achhaiyon Ko Gale Lagayein Aur Humari Kisi Se Dosti Aur Dushmani Sirf Allah Aur Uske Rasool Ke Liye Ho

Humare Nabi Jab Is Dunya Mein Tashreef Laaye To Har Taraf Burayi, Zulm Aur Dehshat Ka Andhera Chhaya Hua Tha, Logon Ke Aqaid, Nazariyaat Aur Amaal Ka Bahut Bura Haal Tha Aur Unhein Seedhe Raaste Par Laana, Burayi Aur Achhayi Ki Pehchan Seekhana, Zindagi Ka Asal Maqsad Batana Koi Asaan Kaam Na Tha Lekin Bahut Hi Qaleel Waqt Mein Aap Sallallaho Alaihi Wa Aalihi Wasallam Ne Is Kaam Ko Mukammal Farmaya Aur Tamam Logon Ko Ek Islam Ki Rassi Thamayi Aur Aisi Misaal Qayam Farmayi Ke Uski Nazeer Dikhana To Door Ki Baat Koi Alfaaz Ke Zariye Tareef Bayaan Bhi Nahin Kar Sakta

Huzoor -e- Akram Sallallaho Alaihi Wa Aalihi Wasallam Ka Mubarak Zamana Bahut Achha Aur Khair Waala Tha, Uske Baad Sahaba -e- Kiraam Ka Zamana Bhi Aisa Hi Raha Lekin Jaise Jaise Waqt Guzarta Gaya, Huzoor Alaihissalam Ke Zamane Se Door Hota Gaya, Jahalat Badhne Lagi Aur Kayi Fitno Ne Sar Uthana Shuru Kiya Hatta Ke Maujuda Daur Humari Nazro Ke Samne Hai Jis Mein Hum Har Din Naye Naye Fitno Ko Dekh Rahe Hain

Deegar Kayi Fitno Ki Tarah Ek Ye Bhi Hai Ke Humare Muashre Mein Beshumar Cheezein Aisi Aa Gayi Hain Jo Ghairo Ki Hain Aur Afsos Ki Baat Ye Hai Ke Hum Aisi Cheezo Ko Pasand Bhi Kar Rahe Hain Yahoodiyo, Nasraniyo, Hinduo Aur Angrezo Ke Beech Reh Kar Musalmano Par Unka Kaafi Asar Hua Hai, Ji Haan! Jab Se Musalmano Ne Inki Sohbat Ikhtiyar Ki Hai Tab Se Humare Chaal Chalan Mein Kaseer Tabdeeliya Huyi Hain, Khane Ka Tariqa, Sone Ka Tariqa, Qaza -e- Hajat Ka Tariqa, Shadiyo Ka Tariqa, Humare Libas, Ghar, Khane Yahan Tak Ke Chehre Ki Sajawat Bhi Ghairo Ki Tarz Par Hai (Allah Ta'ala Reham Farmaye)

Abhi Muslim Naujawano Par Ek Bala Gaane Bajane Ki Surat Mein Mandra Rahi Hai, Humare Naujawano Ne Gaane Bajane Ko Is Qadar Apne Beech Shamil Kar Rakha Hai Ke Jaise Maano Apna Saathi Bana Liya Ho Lekin Unhein Ye Nahin Pata Ke Ye Saathi Unhein Kahan Le Ja Kar Chhodega? Bade Afsos Ke Saath Ye Kehna Pad Raha Hai Ke Bahut Se Log Ab Gaane Bajane Ko Ghalat Hi Nahin Samajhte! Shadi Ho Ya Walima, Aqeeqa Ho Ya Mehendi Ki Rasm, Khatna Ho Ya Koi Aur Mehfil Gaane Bajane Ke Bina

To Mukammal Hi Nahin Hoti Aur Agar Koi Ise Chhod De To Jahilo Ki Taraf Se Ajeeb Ajeeb Taane Diye Jaate Hain Jise Hum Sab Achhi Tarah Jaante Hain Lihaza Batane Ki Zarurat Nahin

Hum Is Niyyat Se Ke Humare Musalman Bhaiyo Ki Islaah Ho Jaaye Aur Unke Dil Mein Humari Baat Utar Jaaye, Gaane Bajane Ke Nuqsanaat Bayaan Kar Rahe Hain Lihaza Guzarish Hai Ke Quraan -o-Sunnat Ke Farameen Mulahiza Farmayein Aur Allah Ta'ala Se Dua Karein Ke Wo Humein Is Gunah Se Bachne Ki Toufique Ata Farmaye (Aamin) Allah Ta'ala Irshad Farmata Hai, Aye Iman Waalo! Islam Mein Poore Dakhil Ho (Jaao) Aur Shaitan Ke Qadmo Par Na Chalo Beshak Wo Tumhara Khula Dushman Hai

Dekhiye! Quraan Mein Allah Ta'ala Ne Bilkul Waazeh Taur Par Farmaya Ke Shaitan Ke Qadmo Par Na Chalo Kyunki Beshak Wo Tumhara Khula Dushman Hai Aur Gaana Bajana Shaitan Ka Tariqa Hai Jaisa Ke Ek Riwayat Mein Hai Ke Nabiye Kareem Sallallaho Alaihi Wa Aalihi Wasallam Ne Irshad Farmaya Ke Shaitan Ne Sabse Pehle Noha Kiya Aur Gaana Gaya

Ek Riwayat Mein Ye Bhi Hai Ke Jab Hazrat Dawood Alaihissalam Apni Sureeli Awaaz Mein Hamd Padhte To Pahad Wajd Mein Aa Jaate, Parinde Udte Udte Gir Padte, Jaanwar Jungalo Se Nikal Aate, Ped Jhoomne Lagte, Behta Paani Tham Jaata, Jangli Jaanwar Ek Ek Mahine Tak Khana Peena Chhod Dete Aur Chhote Bachhe Rona Aur Doodh Mangna Chhod Dete, Jab Shaitan Ne Ye Sab Dekha To Bahut Pareshan Hua Aur Bansuri Aur Tambura Banaya Aur Khoob Gaaya Bajaya, Isse Hua Ye Ke Log Do Girohon (Groups) Mein Bat Gaye, Jo Achhe Log The Wo Hazrat Dawood Alaihissalam Ke Shaidayi Huye Aur Jo Bure Log The Wo Shaitan Ke Saath Gaane Bajane Lage


Ghaur Kijiye! Gaana Bajana Kis Ka Kaam Hai Aur Khud Se Faisla Kijiye Ke Kya Humein Musalman Ho Kar Aise Kaam Karne Chahiye? Kya Humein Shaitan Ke Qadmo Par Chalna Chahiye? Ek Musalman Ka Jawab Har Baar Yahi Hona Chahiye Ke Nahin, Harghiz Nahin! Gaana Sunne Se Insan Ke Dil Mein Nifaq Bhi Paida Hota Hai Chunanche Hazrat Abdullah Bin Mas'ood Radiallaho Ta'ala Anho Ne Farmaya Ke Khel Aur Gaane Ki Awaaz Dil Mein Nifaq Paida Kar Deti Hai Jis Tarah Paani Ghaas Uga Deta Hai

Imam Jalaluddin Suyooti Alaihi Rehma Likhte Hain Ke Gaane Baaje Se Apne Aap Ko Bachao! Kyunki Ye Haya Ko Kam Karte Hain, Shehwat Ko Ubharte Aur Ghairat Ko Barbad Karte Hain Aur Ye Sharab Ke Barabar Hai, Is Mein Nashe Ki Si Taseer Hai

Gaane Bajane Ke Dunyawi Nuqsanaat To Apni Jagah Hain Hi Lekin Aakhirat Mein Bhi Is Gunah Par Shadeed Azaab Hoga Chunanche Nabiye Kareem Sallallaho Alaihi Wa Aalihi Wasallam Ne Irshad Farmaya Ke Jo Gaane Waali Ke Paas Baithe Aur Kaan Laga Kar Dhyan Se Sune To Allah Ta'ala Qayamat Ke Din Uske Kaano (Ears) Mein Seesa (Pighla Ke) Undelega! جرا الله انجر

Gaane Bajane Ke Aur Bahut Saare Nuqsanaat Hain Jin Mein Se Chand Humne Bayaan Kiye Aur Ahle Aqal Ke Liye Itne Hi Kaafi Hain Aur Khulasa Yahi Hai Ke Gaana Bajana Haraam Aur Jahannam Mein Le Jaane Waala Amal Hai Jisse Humein Bachna Chahiye

Ek Aur Zaroori Baat Hum Arz Karna Chahte Hain Ke Aaj Kal Jo Gaane Sune Jaate Hain Wo Aapke Iman Ko Bhi Barbad Kar Sakte Hain! Musalmano Ke Liye Ghaur Ka Maqam Hai! Kahin Aisa Na Ho Ke Ye Gaane Tumhein Kafir Bana Dein!!!



Aksar Filmi Gaano Mein Aise Ash'aar Hote Hain Jinhein Gungunane Ya Padhne Se Insan Kafir Ho Jaata Hai, Saare Nek Amaal Barbad Ho Jaate Hain, Biwi Se Nikah Toot Jaata Hai Aur Humesha Ke Liye Jahannam Ka Mustahiq Ho Jaata Hai! Agar Bina Tauba Kiye Mar Jaaye To Kafir Ki Maut Marta Hai!

Ye Kuchh Gaano Ke Ash'aar Hain Jise Sunne Mein Naujawano Ko Bada Maza Aata Hai Aur Kab Unka Iman Barbad Ho Jaata Hai Unhein Bhi Pata Nahin Chalta, Ghaur Se Mulahiza Kijiye:-

Ye Khayal Rahe Ke Agar Logon Ki Islaah Karna Maqsad Na Hota To Kabhi Hum In Gande Gaano Ko Bayaan Na Karte Lekin Chunki Hum Chahte Hain Ke Humare Naujawano Ko Haqeeqat Pata Chale, Isiliye Hum Yahan Kuchh Gaano Ke Kufriya Ash'aar Ki Nishandehi Kar Rahe Hain

(1) Haseeno Ko Aate Hain Kya Kya Bahane, Khuda Bhi Na Jaane To Hum Kaise Jaane? معاذالله

Allah Ki Panah! Allah Ki Panah! Is Sher Mein Allah Ta'ala Ke Baare Mein Kaha Gaya Ke Khuda Bhi Haseeno Ke Bahane Nahin Jaanta! Allah Maaf Farmaye! Aise Gaane, Gaane Waala Kafir Ho Jaata Hai, Uski Biwi Nikah Se Nikal Jaati Hai Aur Usne Jitne Bhi Nek Amaal Kiye Sab Barbaad! Agar Bina Tauba Ke Mara To Kafir Ho Kar Mara!

Musalman Naujawano! Kya Tumhari Ghairat Bilkul Mar Gayi Hai? Sharm Naam Ki Cheez Baaqi Na Rahi? Jald Se Jald Tauba Karo Aur Gaano Ko Mita Do Taaki Allah Ta'ala Ki Rehmat Ka Darya Tumhari Taraf Badhe

(2) Jitni Pyari Aankhein Hain, Aankho Se Chhalakta Pyaar, Qudrat Ne Banaya Hoga Fursat Se Tujhe Mere Yaar! معاذالله Kya Ye Allah Ta'ala Ki Shan Ke Layaq Hai Ke Kisi Ko Fursat Se Banaye? Musalmano Ab Bas Karo!

(3) Phoolo Sa Chehra Tera, Kaliyo Si Muskan Hai,

Rang Tera Dekh Kar Roop Tera Dekh Ke Qudrat Bhi Hairan Hai

Is Sher Mein Kaha Gaya Ke Tujhe Dekh Kar Qudrat Bhi Hairan Hai! Allah Humein Maaf Farmaye Aur Aise Gande Ash'aar Sunne Se Bachaye

(4) Khuda Bhi Aasman Se Jab Zamee Par Dekhta Hoga,

Mere Mehboob Ko Kisne Banaya Sochta Hoga!

معاذالتد

Is Sher Mein Gustakhi Ki Inteha Ho Gayi, Kya Koi Aur Rab Hai Jisne Uske Mehboob Ko Banaya? Kya Allah Ta'ala Bhi Sochta Hai? Logon! Aankhein Kholo Aur Ab Gaane Bajane Se Tauba Karo (5) Rab Ne Mujh Par Sitam Kiya Hai, Saare Zamane Ka Gham Mujhe Diya Hai معاذالله

Ye Kehna Ke Rab Ne Mujhe Par Sitam Kiya Hai, Allah Ta'ala Ko Zalim Kehna Hai Jo Sareeh Kufr Hai

(6) Meri Nigah Mein Kya Ban Ke Aap Rehte Hain, Qasam Khuda Ki, Khuda Ban Ke Aap Rehte Hain معاذالله

Is Sher Mein Makhlooq Ko Khuda Kaha Gaya Jo Ke Kufr Hai

(7) Ab Aage Jo Ho Anjaam Dekha Jayega, Khuda Tarash Liya Aur Bandagi Bhi Kar Li

Is Mein Do Kufr Hain, Ek Ye Ke Khuda Tarash Liya Aur Dusra Ye Ke Bandagi Bhi Kar Li Mere Bhaiyo Aur Dosto! Kya Ab Bhi Aap In Behuda Gaano Ko Sunenge?

(8) Seep Ka Moti Hai Tu Ya Aasman Ki Dhool Hai, Tu Hai Qudrat Ka Karishma Ya Khuda Ki Bhool Hai

Is Sher Mein Allah Ta'ala Ko Bhoolne Waala Kaha Gaya Aur Musalman Aise Gaane Sunte Hain! (9) Dil Mein Tujhe Bitha Kar, Kar Lungi Band Aankhein,

معاذالله Puja Karungi Teri, Dil Mein Rahungi Tere

Is Sher Mein Mehboob Ki Puja Karne Ki Baat Ki Gayi Hai Jo Ke Kufr Hai

> (10) Haaye! Tujhe Chahenge, Apna Khuda Banayenge! معاذالله

Is Mein Bhi Makhlooq Ko Khuda Banane Ki Baat Ki Gayi Hai Jo Ke Kufr Hai

(11) Dil Mein Ho Tum, Aankho Mein Tum, Bolo Tumhein Kaise Chahun Puja Karu Ya Sajda Karu Jaise Kaho Waise Chahun معاذالله

Is Mein Bhi Makhlooq Ko Poojne Ki Baat Hai Jo Ke Kufr Hai

Mere Naujawan Bhaiyo! Jald Se Jald Tauba Karo Aur Gaano Se Bacho

(12) Saza Rab Jo Dega Wo Manzoor Hum Ko, Ke Ab Hum Tumhari Ibadat Karenge! موازالير Is Sher Ko Padhne Waale Ghaur Karein Ke Kya Aap Azaab -e- Ilahi Ko Dawat Nahin De Rahe Hain?

(13) Ya Rab Toone Dil Toda Mera Kis Mausam Mein?

معاذالله

Is Sher Mein Allah Ta'ala Par Aitraz Kiya Gaya Hai Jo Ke Kufr Hai

(14) Kaise Kaiso Ko Diya Hai, Aise Waiso Ko Diya Hai,

Ab To Chhappad Phaad Maula, Apni Jebein Jhaad Maula معاذالله

Is Sher Mein Bhi Allah Ta'ala Par Aitraz Kiya Gaya Hai Ke Tune Kaise Kaiso Ko Diya Hai Aur Jebein Phadne Ka Lafz Allah Ta'ala Ke Liye!!!

(15) Bechainiya Samet Ke Saare Jahan Ki, Jab Kuchh Na Ban Saka To Mera Dil Bana Diya معازالله

Is Sher Mein Jo Alfaaz Hain "Jab Kuchh Na Ban Saka" Isse Allah Ta'ala Ko Be Bas Qaraar Diya Gaya Hai Jo Ke Khula Kufr Hai Kya Logon Ki Mat Maari Gayi Hai Ke Aise Gaano Ko Sunte Aur Shadiyo Mein Bajate Bhi Hain! (16) Dunya Banane Waale Dunya Mein Aa Kar Dekh, Sadme Sahe Jo Maine Tu Bhi Utha Ke Dekh!

Is Sher Mein Bhi Kufr Hai, Ye Allah Ta'ala Ki Tauheen Hai

(17) Dunya Banane Waale Kya Tere Man Mein Samayi?

معاذالله ?Kaahe Ko Dunya Banayi

Is Sher Mein Allah Ta'ala Par Aitraz Kiya Gaya Hai Jo Ke Kufr Hai

(18) Aye Khuda! In Haseeno Ki Patli Kamar Kyun Banayi?

Tere Paas Mitti Kam Thi Ya Tune Rishwat Khayi! معاذالله

Musalmano! Agar Tumhare Samne Koi Ghair Muslim Allah Ta'ala Ki Shaan Mein Gustakhi Kare To Tum Marne Mitne Ke Liye Tayyar Ho Jaate Ho Lekin Ye Kya Hua Ke Aaj Tumhare Gharo Mein Aise Gaane Bajaye Ja Rahe Hain Jis Mein Khule Aam Allah Ta'ala Ki Tauheen Ki Ja Rahi Hai Aur Hum Ise Sun Rahe Hain!

Naujawano! Tumhare Mobile Phone Par Is Tarah Ke Saikdo Gaane Maujood Hain Jinhein Tum Bade Shauq Se Sunte Ho, Allah Ke Waaste Apne Dil Par Haath Rakh Kar Socho Ke Tum Kya Kar Rahe Ho!

(19) Us Hoor Ka Kya Karein Jo Hazaro Saal Purani Hai معاذالله

Is Mein Jannati Hoor Ki Tauheen Ki Gayi Hai Aur Allah Ta'ala Ki Kisi Neamat Ki Tauheen Kufr Hai

(20) Tujh Ko Di Surat Pari Si, Dil Nahin Tujh Ko Diya,

معازالله ?Milta Khuda To Puchhta Ye Zulm Toone Kyun Kiya

Is Sher Mein Allah Ta'ala Ko Zalim Kaha Gaya Hai Jo Ke Kufr Hai

(21) O Mere Rabba Rabba Ye Kya Ghazab Kiya, Jisko Banana Tha Ladki Use Ladka Bana Diya معازالله

Is Sher Mein Bhi Allah Ta'ala Par Aitraz Kiya Gaya Hai Jo Ke Kufr Hai (22) Kisi Pathhar Ki Moorat Se Muhabbat Ka Irada Hai,

معاذالله Parastish Ki Tamanna Hai Ibadat Ka Irada Hai

Jo Shakhs Kisi Makhlooq Ki Ibadat Karne Ki Tamanna Zahir Kare Wo Usi Waqt Kafir Ho Jaata Hai, Ye Kufriya Ash'aar Humare Liye Zahar Se Zyada Khatarnak Hain, Inse Khud Bhi Bachein Aur Dusro Ki Bhi Islah Karein

(23) Mujhe Bata O Jahan Ke Malik Ye Kya Nazare Dikha Raha Hai?

Tere Samandar Mein Kya Kami Thi Ke Aaj Mujh Ko Rula Raha Hai معاذالله

Is Sher Mein Allah Ta'ala Par Aitraz Kiya Gaya Hai Jo Ke Kufr Hai

> (24) Unki Kya Tareef Karu Main, Fursat Se Hai Rab Ne Banaya معاذالله

Is Mein Ye Alfaaz "Fursat Se Hai Rab Ne Banaya" Kufriya Hain (25) Aye Khuda Behtar Hai Ye Ke Tu Chhupa Parde Mein Hai,

معاذالله Bech Dalenge Ye Log Tujhe Isi Chakkar Mein Hai

Is Sher Mein Allah Ta'ala Ke Liye Bahut Ghalat Alfaaz Istemal Kiye Gaye Hain

(26) Ab Ye Jaan Le Le Ya Rab Ya Iman Le Le Ya Rab, Do Jahan Le Le Ya Rab, Ya Khuda, Fana Fana Ye Dil Hua Fana معاذالله

Kya Koi Musalman Ye Chahega Ke Uska Iman Le Liya Jaaye? Agar Nahin To Phir In Gaano Ko Hum Kyun Sun Rahe Hain?

(27) Jab Se Mere Naina Tere Naino Se Laage Re, Rab Bhi Deewana Lage Re! معازالله

Allah Ta'ala Ko Deewana Kehna Kufr Hai

(28) Muhabbat Ki Qismat Banane Se Pehle, Zamane Ke Malik Tu Roya To Hoga المازالية

Allah Ta'ala Is Se Paak Hai Ke Roye Aur Jo Aisa Kehta Hai Wo Kafir Hai (29) Main Pyaar Ka Pujari Mujhe Pyar Chahiye, Rab Jaisa Hi Sundar Mujhko Yaar Chahiye معاذالله

Pyaar Ki Puja Karna Kufr Hai Aur Allah Ta'ala Ki Tarah Kisi Aur Ko Kehna Bhi Kufr Hai Naujawano! Ishq -e- Mijazi Se Tauba Karo!

(30) Agar Mile Khuda To, To Puchhunga Khudaya, Jism Mujhe De Ke Mitti Sa Sheeshe Sa Dil Kyun Banaya,

Waah Re Waah Teri Qudrat معاذالله

Is Sher Mein Bhi Allah Ta'ala Par Aitraz Kiya Gaya Hai Ke "Kyun Banaya" Ye Kufr Hai Aur Jitne Bhi Ash'aar Humne Bayaan Kiye Sab Mein Kuchh Na Kuchh Kufr Hai

Iske Ilawa Laakho Ash'aar Hain Jise Log Bade Shauq Se Sunte Hain Aur Jo In Kufriya Gaano Ko Dilchaspi Se Sune Ya Padhe Wo Kafir Ho Gaya Aur Uske Tamam Nek Amaal Barbad Ho Gaye, Saari Nekiya Khatm Ho Gayi, Shadi Shuda Tha To Nikah Bhi Gaya, Mureed Tha To Bai'at Bhi Khatm Aur Ab Us Par Farz Hai Ke Tauba Kare Aur Kalima Padh Kar Naye Sire Se Musalman Ho Aur Tajdeed -e-Nikah Bhi Kare Aur Phir Mureed Bane Khalifa -e- Huzoor Muftiye Aazam Hind, Shaarahe Bukhari, Hazrat Allama Mufti Shariful Haque Amjadi Alaihi Rehma Farmate Hain Ke Is Tarah Ke (Sareeh) Kufriya Aur Behuda Ash'aar Koi Gaaye (Padhe) To Wo Kafir Hai Agarche Wo Ye Kahe Ke Mera Ye Aqeeda Nahin, Kufr Bakne Ke Baad Ye Bahana Kaam Nahin Dega, Isliye Har Musalman Mard Wa Aurat Par Farz Hai Ke Wo Ilme Deen Haasil Kare, Kufr Wa Islam Ko Pehchane, Zarooriyat -e- Deen Wa Ahle Sunnat Ko Samjhe Taaki Aisi Ghalati Na Hone Paaye

Jaagna Hai Jaag Lo Aflaak Le Saaye Tale, Hashr Tak Sote Rahoge Khaak Ke Saaye Tale

Allah Ta'ala Humein Tamam Buraiyo Se Bachaye Aur Dusro Ko Burayi Se Rokne Aur Neki Ka Hukm Dene Ki Toufique Ata Farmaye

Our Other Books





